



Etne båtlag

Saksbehandlar, innvalstelefon

Hedda Vik Askeland, 5557 2055

Løyve etter forureiningslova utfylling i sjø for utbetring av badestranda ved Etne småbåthamn i Etne kommune

Statsforvaltaren gjev Etne båtlag løyve til anleggsarbeid i sjø ved gnr/bnr 10/1. Tiltaket omfattar mudring av 150 m³ massar, dumping av desse massane og utlegging av naturstein og skjelsand med eit volum på 900 m³. Føremålet med tiltaket er å utbetre badestranda ved Etne småbåthamn i Etne kommune.

Tiltaket er planlagt gjennomført i perioden 1. mars 2026 til 15. mai 2026, eventuelt same periode i 2027 ved forseinkingar.

Det er ikkje registrert nokon viktige naturverdiar eller naturtypar i området.

Løyvet er gjeve med heimel i forureiningslova § 11, jf. § 16. Vilkår for løyvet er gjevne i vedlegg som følgjer løyvet.

Vi viser til søknad motteken 8. desember 2025.

Vedtak om løyve

Statsforvaltaren gjev løyve til mudring og dumping sjø til Etne båtlag. Løyvet er heimla i forureiningslova § 11, jf. § 16. Løyve er gjeve på spesifikke vilkår som er lista opp i eige vedlegg.

Vedtak om gebyr for sakshandsaming

Statsforvaltaren tar gebyr for arbeid med løyve og kontroll etter forureiningslova. På bakgrunn av Statsforvaltarens ressursbruk i saka, jf. forureiningsforskrifta §§ 39-3 og 39-4.

Vi varsla gebyr etter sats 7, 22 900 kroner i vårt brev datert 11. desember 2025. Miljødirektoratet har auka gebyrsatsane med verknad frå 1. januar 2026 for arbeid med løyvet, og difor blir gebyret for sats 7 på kroner 23 700. Faktura blir sendt frå Miljødirektoratet. Sjø forureiningsforskrifta kapittel 39 for å lese meir om sakshandsamingsgebyret.




Om tiltaket

Etne båtlag søker om løyve etter forureiningslova til mudring og dumping av massar for å utbetre badestranda ved Etne småbåthamn (gnr./bnr. 10/1) i Etne kommune. Området har vore nytta som badestrand i mange år, men det er no ubehageleg å bade der. Fig. 1 viser badestranda.



Figur 1: Badestranda ved Etne småbåthamn.

Båtlaget har satt i gang eit dugnadsprosjekt for å reinska stranda for blautmasse og leggje ut eit 30 cm tjukt lag med skjelsand på området. Volumet sand utgjer 900 m³ over eit areal på 3000 m². Dei oppmudra blautmassane med eit volum på 150 m³ er planlagde flytta og dumpa under flytebryggje over eit areal på 400 m² på om lag 10-15 meters djupn. Sjå fig. 2 for teikning over arealet som skal mudrast og dumpast, samt området der skjelsand og naturstein skal leggjast ut.




Figur 2: Raudt illustrerer oppmudra massar, og området markert med rosa viser kor det skal dumpast. Blått viser området som skal fyllast ut med naturstein, medan oransje viser arealet som skal fyllast ut med skjelsand. Utsleppsleidninga er òg teikna inn.



Mudringa vil utførast med gravemaskin frå land. Dumpinga skal skje ved bruk av gravemaskin med lang stikke (ca. 15 meter) ved lavvatn. Naturleg skjelsand frå havet skal pumpast på plass ved bruk av båt, og skal gjennomførast av Entreprenør Sandstrand Roslagen.

Utsleppsleiding til Etne kommune går gjennom området. Etne kommune planlegg å leggje ny sjøleiding lengre ut i fjorden, slik at ho kjem lengre vekk frå badestranda. Området ligg i eit gammalt elveleie. Øvst finst det lausmassar, og under desse ligg det fastare elvebotn.

Norconsult Norge AS har prøvetatt sedimenta i mudringsområdet (sjå fig. 2) i november 2025. Resultata frå undersøkinga er samanlikne med tilstandsklassar (TK) for forureina sediment i Miljødirektoratets rettleiar M-608¹. Det ble gjort undersøking med 3 prøvestasjonar og 4 prøvepunkt per stasjon på 1 meters djupne. Ingen prøvepunkt viste tungmetall og organiske miljøgifter over TK II (god).



Figur 3: Sedimentstasjonar ved mudring- og dumpingområdet i Etne.

Området blir mykje nytta til rekreasjon og friluftsliv for innbyggjarane i Etne kommune. Det er ikkje registrert nokon viktige naturverdiar eller naturtypar i området.

Tiltaket er planlagt gjennomført i perioden 1. mars 2026 til 15. mai 2026. Dersom finansiering eller andre uventa forhold hindrar fullføring innanfor denne perioden, vil arbeidet eventuelt bli gjennomført i tilsvarende periode året etter, det vil seie 1. mars 2027 til 15. mai 2027.

¹ Miljødirektoratets rettleiar M-608. Grenseverdier for klassifisering av vann, sediment og biota. 30.10.2020.



Høyring

Søknaden vert sendt på høyring til Etne kommune, Fiskeridirektoratet og Bergens Sjøfartsmuseum samt lagt ut på høyring på Statsforvaltarens heimeside. Frist for å gje eventuelle merknader var 16. januar 2026.

Vi fekk følgande høyringsutsegn frå Fiskeridirektoratet, Bergens Sjøfartsmuseum og Etne kommune.

Fiskeridirektoratet (22. desember 2025)

Attgjeving av uttale:

"Tiltaket er relativt lite i omfang og utstrekning, og går føre seg innanfor småbåthamna. Arbeidet må utførast så skånsamt som mogleg for å ikkje ha negativ påverknad på område med blautbotn i Bekkjavik. Utover dette kan vi ikkje sjå at tiltaket er til vesentleg ulempe for fiskeriinteressene."

Bergens Sjøfartsmuseum (16. januar 2026)

Attgjeving av uttale:

"Museet kjenn ikkje til kulturminne ved Etne i Etne kommune som kan bli direkte råka av det omsøkte tiltaket."

Museet har derfor ingen merknader til det planlagde arealinngrepet.

Det er likevel mogleg at det ligg kulturminne i det aktuelle området. Me gjer derfor merksam på at tiltakshavaren pliktar å gje melding til museet dersom ein under arbeid i sjøområda finn skipsvrak, keramikk eller andre marine kulturminne. Dersom kulturminne på sjøbotnen kan bli råka av tiltaket, må arbeidet under vatn straks stoppast. Verksemda må i så fall ikkje takast opp att før museet har undersøkt og eventuelt frigjeve området. Eventuelle brot på desse vilkåra vil være i strid med føresegnene i Lov av 9. juni 1978 nr. 50 om kulturminne."

Etne kommune (19. januar 2026)

Attgjeving av uttale:

"Etne kommune er kjent med planane til Etne Båtlag om mudring innafor Etne båthamn, for utbetring av badevika der. Tiltaket er i avklart i høve til sakshandsaming etter plan- og bygningslova (ikkje søknadspliktig tiltak, jf. SAK10, kap. 4-1). Jf. tilbakemelding til båtlaget 25.06.25. Kommunen legg til grunn at overskotsmassen vert handsama i tråd med regelverket."

Etne båtlag gjennomførte for nokre år sidan er stor og positiv oppgradering av landareala på badeplassen. Det har gjennom mange år vore lagt på skjelsand på inste delen av badevika, men sanda har vorte vaska ut igjen relativt raskt. Båtlaget ønskjer no ei større mudring og påføring av større mengder skjelsand i eit større område av vika. Tiltaket er positivt og godt utgreidd.

Etne kommune har leidningsnett i området og planar for å skifte ut eksisterande avløpsleidning ut i sjø i same område som der er planlagt mudring. Søknaden har såleis vore til uttale hos kommunen si driftsavdeling, sjå e-post nedanfor datert 16.01.26, inkl. vedlagte kart over leidningskart. Båtlaget er kjent



med kommunen sine planar i området. Uttalen frå driftsavdelinga er kanskje ikkje relevant for det lowerket Statsforvaltaren handsamar mudringa etter, men vi legg ved uttalen, med kopi til Etne Båtlag, sidan der er behov for nærare samordning og kontakt mellom partane om planlagde tiltak.

Vi ser at Fiskeridirektoratet i si fråsegn frå 22.12.25 nemner blautbotnområdet i Bekkjavika. Dette ligg kring 700 m søraust om Etne båthamn og vil ikkje verte påverka av omsøkte tiltak.

Utover dette har vi ingen merknadar til omsøkte tiltak."

Uttale frå driftsavdelingen i Etne kommune (16.januar 2026):


"Det er viktig at mudring, massehandtering og utlegging av naturstein ikkje fører til skade på eksisterande og planlagde leidningar. Sjå vedlagt kartutsnitt.

Den grøne punkt-strek-linja viser den eksisterande utsleppsleidninga. Eksisterande leidning vil bli skifta ut i løpet av 2026. Den nye leidninga kjem til å liggje i om lag same trasé som den eksisterande.

Dei svarte strek-linjene er eksisterande overvassleidningar. I tilsendt notat frå Norconsult ser det ut til at det skal leggjast naturstein i området der overvassleidninga blir ført til sjøen. Det må sikrast at naturstein ikkje blir lagd over overvassleidninga, og at avrenning ut leidninga ikkje blir hindra.

Den grøne ringen med trekant markerer ein kommunal pumpestasjon. Denne stasjonen har eit nødoverløp. Det trengst ein kamerakontroll for å avklare om nødoverløpet er kopla på overvassleidninga, eller om det er lagd ei eiga leidning (som ikkje er teikna inn på kartet).

Det er godt mogleg at det ligg fleire leidningar og/eller kablar i området som ikkje er lagt inn i det kommunale kartverket."



Figur 4: Eksisterande og planlagde leidningar ved Etne båthamn.

Rettsleg grunngjeving for løyve

Forureiningslova

Etter forureiningslova § 7 må ingen sette i verk noko som kan medføre forureining utan at det er lovleg etter unntaksreglane i § 8 eller tiltaket har løyve etter § 11.



Arbeid i sjø frå land er mellombels anleggsarbeid og er som hovudregel lovleg utan løyve, jf. forureiningslova § 8 første ledd nr. 3, når forureininga frå anleggsarbeidet er "vanleg". Utfylling som bidreg til å spreie finstoff som kan påverke fiskeinteresser, verneområder, marine artar eller bidra til plastforureining, er ikkje vanleg forureining og tiltaket må ha løyve. Statsforvaltaren finn at arbeidet i dette tiltaket krev løyve etter lovas § 11, med vilkår for utføring etter § 16.

Statsforvaltaren legg til grunn anbefalingar i Miljødirektoratets rettleiar M-350/2015 "Handtering av sediment" i vår vurdering av saka.

Naturmangfaldlova

Forvaltningsmåla i naturmangfaldslova §§ 4 og 5 ligg til grunn for Statsforvaltarens myndigheitsutøving. Videre skal prinsippa i §§ 8 til 12 om blant anna kunnskapsgrunnlag, føre-var-tilnærming og samla belastning leggjast til grunn som retningslinjer når Statsforvaltaren treffer avgjerder som rører ved naturmangfald.

Vassforskrifta

Søknader om løyve til tiltak i sjø og vassdrag skal også vurderast etter vassforskrifta. Vassforskrifta inneheld forpliktande miljømål om at myndighetene skal sørge for at alle vassførekomstar skal oppnå god kjemisk og økologisk tilstand innan 2027 med mindre det er gitt unntak med heimel i § 9 eller § 10.

Avgrensing mot plan- og bygningslova

Statsforvaltaren kan ikkje gje løyve etter forureiningsloverket dersom dette er i strid med endelege planer etter plan- og bygningslova, jf. forureiningslova § 11 fjerde ledd. Etne kommune skriv i sin uttale at tiltaket er avklart i høve til sakshandsaming etter plan- og bygningslova. Vi legg til grunn at tiltaket er innanfor dei gjeldande planane etter plan- og bygningslova, og at det ikkje er i strid med endelege planar.

Vår vurdering av søknaden

Statsforvaltaren vurderer at søknaden med tilhøyrande dokumentasjon er i samsvar med forureiningsforskrifta § 36-2 sine krav til innhald i søknader om løyve etter forureiningsforskrifta.

Grunngjeving for valde vilkår og krav

Mudring og dumping i sjø vil kunne medføre spreining av partiklar som kan ha negative effektar på naturverdiar. Mineralpartiklar som svevar fritt i vassmassane kan skade på gjellene til fisk og dei kan feste seg på pelagiske fiskeegg, som hos torsk og hyse, og få egga til å søkkje. Noko som kan auke eggdødelegheita.

Partikkeltilførsel i sjø over lengre tid vil også kunne medføre nedslamming av sjøbotnen, noko som vil kunne føre til at leveområdet til botnlevande organismar vert endra eller øydelagt. Dersom sedimenta i tiltaksområdet er forureina, kan også forureining spreie seg. I dette tilfellet er det ikkje funne forureina massar over TK II. Det er ikkje kartlagt nokon viktige naturverdiar eller naturtypar i området.



Vurderingar etter naturmangfaldlova og vassforskrifta

Kravet til kunnskapsgrunnlaget er etter vår vurdering oppfylt, jf. naturmangfaldlova § 8. Sidan vi vurderer kunnskapsgrunnlaget som tilfredsstillande, vil ikkje føre-var-prinsippet (NML § 9) kome til bruk.

Vi har teke omsyn til økosystemet og den samla belastninga (NML § 10) gjennom vurderingar som ligg til grunn for krava som er sett i vilkåra i løyvet. NML § 11 påpeikar at det er tiltakshavaren som skal bere kostnadene til avbøtande tiltak.

Miljømålet i vassforskrifta er at alle vassførekomstar skal oppnå minst god økologisk og kjemisk tilstand. Ein forverring av ein vassførekomst kan ikkje tillatast med mindre det er høve til å gje unntak, jf. vassforskrifta § 12.

I denne saken legger Statsforvaltaren til grunn at tiltaket vil gje ein midlertidig påverknad og at tilstanden i resipientane vil bli gjenoppretta når arbeidet stansar. Vi ser det derfor ikkje som sannsynleg at tiltaket vil kunne føre til at miljømåla ikkje blir nådde, eller at tilstanden til vassførekomsten blir forverra. Krava i vassforskrifta er difor ikkje til hinder for å gje løyvet etter forureiningslova.

Endring og omgjerung

Vi vil påpeike at all forureining frå verksemda isolert sett er uønskt. Sjølv om utsleppa ligg innanfor dei fastsette grensene, pliktar verksemda å redusere utsleppa så langt som mogleg utan urimelege kostnader. Det same gjeld utslepp av komponentar det ikkje er sett grenser for gjennom særskilte vilkår.

Verksemda er pliktig til å unngå unødvendig forureining, jf. forureiningslova § 7. Viser det seg at forureiningsforholda endrar seg, kan Statsforvaltaren med heimel i forureiningslova § 18 endre vilkåra i løyvet og setje nye vilkår, og om nødvendig trekkje løyvet tilbake. Endringar skal vere basert på skriftleg sakshandsaming og ei forsvarleg utgreiing av saka. Ein endringssøknad må difor sendast i god tid før ei eventuell endring kan gjennomførast.

At vi har gitt løyve til forureining fritar ikkje verksemda for erstatningsansvar for skade, ulemper eller tap som forureininga har ført til, jf. forureiningslova § 56. I tillegg til dei krava som følgjer av løyvet, pliktar verksemda å overhalde forureiningslova og produktkontrolllova med tilhøyrande forskrifter. Nokre av forskriftene er nemnde i løyvet. For informasjon om andre reglar som kan vere aktuelle for verksemda viser vi til heimesida til Miljødirektoratet, www.miljodirektoratet.no. Brot på løyvet er straffbart etter forureiningslova §§ 78 og 79.

Brot på krav som følgjer direkte av forureiningslova og produktkontrolllova med tilhøyrande forskrifter er òg straffbart.

Rett til å klage

Partane i saka og andre med særleg interesse kan klage innan tre veker frå verksemda har motteke dette brevet, jf. forvaltningslova § 28. I ei eventuell klage skal det gå klart fram kva klagen gjeld, og kva endringar ein ønskjer. Klagen bør vere grunngjeven og skal sendast til Statsforvaltaren i Vestland. Klageinstansen er Miljødirektoratet.



Ein eventuell klage fører ikkje automatisk til at gjennomføringa av vedtaket blir utsett. Statsforvaltaren eller Miljødirektoratet kan etter oppmoding, eller på eige initiativ, avgjere at vedtaket ikkje skal gjennomførast før klagefristen er ute eller klagen er avgjort. Ei slik avgjerd kan det ikkje klagast på.

De kan også klage på vedtaket om gebyrsats, jf. forureiningsforskrifta § 41-5. Ein eventuell klage skal vere grunngjeven, og ho må sendast til Statsforvaltaren i Vestland innan tre veker. Ein eventuell klage fører ikkje automatisk til at vedtaket blir utsett. Verksemda må difor betale det fastsette gebyret. Dersom Miljødirektoratet godtek klagen, vil overskotsbeløpet verte refundert.

Med helsing

Magne Nesse
senioringeniør

Hedda Vik Askeland
rådgjevar

Dokumentet er elektronisk godkjent

Vedlegg:
Løyvets vilkår

Kopi til:
Etne kommune
Fiskeridirektoratet
Bergens Sjøfartsmuseum



Løyve etter forureiningslova til utfylling i sjø for utbetring av badestranda ved Etne småbåthamn i Etne kommune

Statsforvaltaren gjev Etne båtlag løyve med heimel i forureiningslova § 11, jf. § 16. Løyvet er gitt på grunnlag av opplysningar i søknad av 8. desember 2025 og andre opplysningar som kom fram under sakshandsaminga. Løyvet gjeld frå dags dato og fram til anleggsarbeidet er avslutta.

Dersom de ønskjer endringar utover det som er opplyst i søknaden eller under sakshandsaminga og som kan ha miljømessig betyding, må de på førehand avklare dette skriftleg med Statsforvaltaren.

Dersom heile eller vesentlege delar av løyvet ikkje er teke i bruk innan to år skal de sende melding til Statsforvaltaren om forventa oppstart, status i prosjektet med beskriving av eventuelle endringar som endrar risiko for forureining og ev. behov for endra avbøtande tiltak . Statsforvaltaren vil då vurdere behov for eventuelle endringar i løyvet og om endring av løyvet krev ny søknadsrunde.

Data om verksemda

Bedrift	Etne båtlag
Postadresse	Tongane 22, 5590 Etne
Kommune og fylke	Etne, Vestland
Organisasjonsnummer/ eigd av	916 938 462

Statsforvaltaren sine referansar

Løyvenummer	Anleggsnummer	Saksnummer
2026.0051.T	4611.0060.01	2025/14704

Løyve gitt første gong: 21. januar 2026	Endringsnummer:	Løyve sist endra:
Magne Nesse senioringeniør	Hedda Vik Askeland rådgjevar	

Dokumentet er godkjent elektronisk



Endringslogg

Endringsnummer	Endringar av	Punkt	Endringar



1 Rammevilkår

1.1 Omfang

Løyvet gjev vilkår for å redusere forureining frå utfylling i sjø ved gnr./bnr. 10/1 ved Etne småbåthamn i Etne kommune.

Tiltaket i sjø omfattar mudring og dumping av 150 m³, samt utlegging av naturstein og skjelsand med eit volum på 900 m³.

Statsforvaltaren legg til grunn at tiltaka skal gjennomførast som nemnt i søknad av 8. desember 2025 og tilleggsopplysningar i saka med mindre anna er avtala med Statsforvaltaren.

1.2 Varsel om oppstart

Statsforvaltaren skal varslast om oppstart av anleggsarbeidet seinast ei veke før anleggsarbeida startar. Det kan varslast med ein e-post til sfvlpost@statsforvalteren.no.

2 Generelle vilkår

2.1 Plikt til å redusere forureining så langt som mogeleg

All forureining frå verksemda, medrekna utslepp til luft og vatn, støy og avfall, er isolert sett uønskt. Sjølv om utsleppa vert haldne innanfor fastsette utsleppsgrenser, pliktar verksemda å redusere utsleppa sine, så langt det er mogleg utan urimelege kostnader. Plikta omfattar også utslepp av komponentar som det ikkje er sett uttrykkelege grenser for gjennom vilkår i dette løyvet.

2.2 Plikt til førebyggjande vedlikehald

For å halde dei ordinære utsleppa på eit lågast mogleg nivå og for å unngå utilsikta utslepp, skal verksemda sørgje for førebyggjande vedlikehald av utstyr som kan ha noko å seie for utsleppa. System og rutinar for vedlikehald av slikt utstyr skal vere dokumenterte.

2.3 Tiltak ved auka forureiningsfare

Dersom det oppstår fare for auka forureining skal verksemda så langt det er mogleg utan urimelege kostnader setje i verk tiltak som er nødvendige for å eliminere eller redusere den auka forureiningsfaren. Om nødvendig må verksemda redusere eller innstille drifta.

Tiltakshavar skal så snart som mogeleg informere Statsforvaltaren om unormale tilhøve som har eller kan føre til vesentleg auka forureining eller forureiningsfare. Akutt forureining skal i tillegg varslast i samsvar med punkt 3.3.

2.4 Miljøriskovurdering av anleggsarbeida

Dette løyvets vilkår er basert på dei miljøriskovurderingane som er utført i samband med søknad om løyve etter forureiningslova og dei forslag til avbøtande tiltak som er søkte om for å redusere fare for forureining til eit akseptabelt nivå.

Verksemda plikter å ha oversikt over alle aktivitetar og forhold som kan føre til forureining og kunne gjere greie for risiko. Ved endra forhold skal miljøriskovurderinga oppdaterast. Resultata skal vurderast opp mot akseptabel miljørisiko.



Med utgangspunkt i risikovurderinga skal verksemda iverksette risikoreduserande tiltak. Både sannsyn- og konsekvensreduserande tiltak skal vurderast. Tiltakshavar skal ha ein oppdatert plan over risikoreduserande tiltak, og sikre at tiltak herifrå vert innarbeida og gjennomført.

2.5 Ansvar

Tiltakshavar er ansvarleg for å sikre og dokumentere at vilkåra i dette løyvet vert stetta. Tiltakshavar pliktar å ha oversikt over alle aktivitetar som kan medføre forureining og kunne gjere greie for risikoforhold. Tiltakshavar pliktar vidare å orientere vedkommande som skal gjennomføre tiltaka om de vilkår som gjelder, samt de restriksjonar som er lagt på arbeidet.

2.6 Erstatningsansvar

Sjølv om løyve er gitt, pliktar den som forårsakar forureining eller annan type skade å svare for erstatning som måtte følge av alminnelege erstatningsreglar.

2.7 Kulturminne i sjø

Stiftelsen Bergens Sjøfartsmuseum gjer merksam på at tiltakshavar pliktar å gje melding til museet (marinarkeologi@museumvest.no) dersom ein under arbeid i sjøområda finn skipsvrak, keramikk eller andre marine kulturminne. Dersom kulturminne på sjøbotnen kan bli råka av tiltaket, må arbeidet under vatn straks stoppast. Tiltakshavar må i så fall ikkje starte opp att før museet har undersøkt og eventuelt frigjeve området. Eventuelle brot på desse vilkåra vil være i strid med føresegnene i Lov av 9. juni 1978 nr. 50 om kulturminne.

2.8 Sakshandsaming etter anna lovverk

Dette løyvet fritenk ikkje for handsaming etter anna lovverk som er relevant i saka, til dømes hamne- og farvasslova og plan- og bygningslova.

3 Internkontroll, beredskapsplan og akutt forureining

3.1 Internkontroll

Tiltakshavar pliktar å etablere internkontroll for sin verksemd i medhald til internkontrollforskrifta¹. Internkontrollen skal blant anna sikre og dokumentere at tiltakshavar stettar krava i dette løyvet, forureiningslova, produktkontrolllova² og andre relevante forskrifter til desse lovene. Tiltakshavar plikter å halde internkontrollen oppdatert.

Når ein tiltakshavar som oppdragsgivar engasjerer oppdragstakar (entreprenør eller liknande) til å utføre oppgåver på tiltakshavars anlegg, skal oppdragsgivar sørge for at oppdragstakar er kjent med og har internkontrollsystem i tråd med løyvets vilkår.

Tiltakshavar plikter alltid å ha oversikt over alle aktivitetar og forhold som kan føre til forureining og kunne gjere greie for risiko. På basis av miljørisikoanalyse skal tiltakshavar sette i verk miljørisikoreduserande tiltak.

¹ Systematisk helse-, miljø- og sikkerhetsarbeid i virksomheter – forskrift av 06.12.1996 nr 1127 (internkontrollforskriften)

² Produktkontrolllova av 11.06.1979 nr 79



3.2 Beredskapsplan

Den ansvarlege skal sørge for å ha en nødvendig beredskap for å hindre, oppdage, stanse, fjerne og avgrense påverknad av akutt forureining for si verksemd, jf. forureiningslova § 40. Beredskap skal stå i et rimeleg forhold til sannsyn for akutt forureining og omfanget av skadane og ulempene som kan inntreffe. Beredskapsplikta inkluderer også utstyr og kompetanse til å fjerne og avgrense verknaden av forureininga.

Tiltakshavar skal utarbeide beredskapsplan for tiltaket. Ved endra forhold skal beredskapsplanen oppdaterast. Beredskapsplanen skal være tilgjengeleg og kjent for dei som utfører arbeid der akutte hendingar i flg. planen, kan oppstå.

3.3 Varsling om akutt forureining

Ved akutt forureining eller fare for akutt forureining som følge av tiltaket, skal den ansvarlege straks varsle på telefon 110, etter Forskrift om varsling av akutt forureining eller fare for akutt forureining fastsett av Miljøverndepartementet 9. juli 1992. Statsforvaltaren skal også varslast på sfvlpost@statsforvaltaren.no.

4 Vilkår for utføring av tiltak i sjø

4.1 Generelt

Tiltaka i sjø skal utførast på ein måte som minimerer spreining av partiklar og tilslamming av vassmassane. Dersom det oppstår utilsikta forureiningssituasjonar skal arbeidet stanses og korrigierende tiltak gjennomførast. Vi forutset at båtlaget følgjer uttale frå driftsavdelinga i kommunen *at naturstein ikkje blir lagd over overvassleidninga, og at avrenning ut leidninga ikkje blir hindra*.

4.2 Aktsemd ovanfor framande organismar

Den framande arten havnespy/japansk sjøpung (*Didemnum vexillum*) er allereie etablert fleire stader i landet. Dette er ein framand og uønskt art som formerer seg raskt og forårsakar store problem for marine miljø og næringar. Arten veks blant anna på skrog, fortøyingar, bryggjer og anna som finst i sjøen. Vestland fylke har gjennom dei siste åra registrert ein auke i observasjonar av havnespy. Havnespy er påvist ved kaier i Haugesund, Askøy, Bergen og fleire stadar i Sogn (Florø, Måløy, Sløvåg). Arten blir spreidd via skipsfart, særleg i dei største hamnene som har besøk av utanlandske skip. Arten kan òg bli spreidd til mindre hamner via småbåtar eller festa til tauverk, blåsar og andre flyteobjekt i sjøen.

Statsforvaltaren minner om aktsemdsplikta i medhald til forskrift om framande organismar § 18. Der står det at den som set i verk tiltak som kan medføre utilsikta spreining av framande organismar i miljøet, skal opptre aktsamt for å hindre at aktiviteten medfører uheldige følgjer for det biologiske mangfaldet. Tiltakshavar skal ha kunnskap om risikoen aktiviteten inneber, kunnskap til å treffe førebyggjande tiltak og kunnskap til å raskt avdekkje utilsikta spreining av framande organismar. Mistanke om funn av havnespy [må meldast inn](#) og verifiserast av marinbiologisk kompetanse. Dersom havnespy blir bekrefta, [skal observasjonen rapporterast til Artsdatabanken](#), og det må setjast i verk tiltak for å unngå vidare spreining. Slike tiltak skal skje i samsvar med [retteleiing gitt av Sjøfartsdirektoratet](#).

Kontroll gjeld også til transporterte båtar og utstyr. Dersom havnespy blir oppdaga, skal Statsforvaltaren kontaktast og orienterast om kva tiltak som blir sett i verk for å overhalde aktsemdsplikta.



5 Kontroll- og overvaking

5.1 Plan for kontroll og overvaking

Det skal utarbeidast ein kontroll- og overvakingsplan for tiltaket. Planen må ha tilstrekkeleg omfang til å avdekke spreiring av forureining frå tiltaket, medrekna kontroll med spreiring av partiklar og plast. Kontroll- og overvakingsplanen skal avdekke eventuelle negative påverknader på naturmiljøet frå anleggsarbeidet.

Kontroll- og overvakingsplanen skal sikre at vilkåra i løyvet vert stetta, og planen skal utarbeidast i tråd med tilrådingane gitt i Miljødirektoratet si rettleiar³ for handtering av sediment M-350/2015. Måleutstyr, metodar, gjennomføring og analysar skal følgje norsk standard.

6 Avfall

6.1 Generelle krav

Verksemda pliktar så langt det er mogleg utan urimelege kostnader eller ulemper å unngå at det blir danna avfall som følgje av tiltaka. Særleg skal innhald av skadelege stoff i avfallet avgrensast mest mogeleg. Verksemda pliktar å sjå til at all handtering av avfall, under dette gjenvinning, blir utført i samsvar med gjeldande regler fastsett i eller i medhald av forureiningslova og avfallsforskrifta.

6.2 Handtering av farleg avfall

Verksemda skal handtere farleg avfall i tråd med avfallsforskrifta kapittel 11 om farleg avfall.

Farleg avfall som blir lagra i påvente av levering/henting skal lagrast slik måte at det ikkje fører til avrenning til grunn, overflatevatn eller avløpsnett. Lagra farleg avfall skal være merka og skal ikkje blandast saman med anna avfall. Lagring skal skje i tett container eller under tak på fast dekke. Lageret skal være sikra mot uvedkommande.

Farleg avfall skal leverast vidare til godkjend mottak eller behandlingsanlegg minst ein gang per år. Farleg avfall skal deklarerast på www.avfallsdeklarering.no.

6.3 Plast

Det skal gjerast tiltak for å avgrense tilførsel av plast til naturen. Det skal gjennomførast opprydding av plast og annet avfall undervegs og i etterkant av tiltaket ved tiltaksområdet og nærliggande områder. Rutinar for dette skal føreligge skriftleg. Oppsamling av eventuelt avfall i sjøen skal loggførast. Rutinar for overvaking og oppsamling av avfall i sjøen skal inngå i overvakingsplanen. Oppsamla avfall skal leverast til lovleg avfallsmottak.

Miljødirektoratet sitt faktaark⁴ M-1085|2018 kan nyttast som ein rettleier.

³ Håndtering av sediment. Miljødirektoratet M-350

⁴ Problemer med plast i sjø ved utfylling av sprengstein i sjø. Miljødirektoratet M-1085/2018



7 Rapportering og dokumentasjon

7.1 Sluttrapport

Det skal sendast inn sluttrapport frå arbeida innan 8 veker etter at anleggsarbeida er avslutta. Rapporten skal oppsummera anleggsarbeidet, og skal innehalde:

- Skildring av gjennomføringa av tiltaka.
- Oversikt over uønskte hendingar, merknader og ei skildring av eventuelle avbøtande tiltak som er gjennomførte for å hindra uheldig påverknad på omgjevnadene.
- Dokumentasjon av levering av eventuelt avfall.

8 Tilsyn

Verksemda pliktar å la representantar for Statsforvaltaren eller andre som har styresmakt, føre tilsyn med verksemda til ei kvar tid.